

**Siasatan komprehensif, tiada pelanggaran undang-undang - pegawai PM  
Astro Awani  
Ogos 30, 2016**

**KUALA LUMPUR:** Dana dalam akaun Perdana Menteri Datuk Seri Najib Tun Razak telah disiasat secara komprehensif, dan pelbagai pihak berkuasa telah memutuskan bahawa tidak berlaku sebarang pelanggaran undang-undang, menurut seorang pegawai khas.

Setiausaha Akhbar Najib, Datuk Seri Tengku Sariffuddin Tengku Ahmad, berkata dalam kenyataan hari ini bahawa menteri luar Arab Saudi telah mengesahkan dana dalam akaun perdana menteri adalah sumbangan daripada kerabat diraja Arab Saudi.

"Suruhanjaya Pencegahan Rasuah Malaysia malahan telah pergi di Arab Saudi dan memeriksa semua dokumen perundangan dan telah menemu bual wakil-wakil penyumbang tersebut," katanya.

Kenyataan itu sebagai respons kepada dakwaan terbaru dibuat oleh bekas Timbalan Perdana Menteri Tan Sri Muhyiddin Yassin terhadap perdana menteri.

Tengku Sariffuddin selanjutnya berkata Muhyiddin merupakan individu yang kecewa selepas dipergunakan sebagai boneka bekas Perdana Menteri Tun Dr Mahathir Mohamad.

Muhyiddin, katanya, berasa "kecewa bahawa beliau tidak akan dapat menjadi perdana menteri seperti dijanjikan, kerana cubaan mereka untuk menyingkirkan pemimpin yang dipilih secara demokrasi telah gagal; dan marah kerana kini hidup sengsara akibat daripada perbuatannya sendiri".

"Ketidaksetiaan dan salah membuat pengiraan oleh Tan Sri Muhyiddin berikutan mahu mencapai cita-citanya itu telah membawa kepada penamatan kerjayanya secara mengaibkan.

"Beliau kini terdesak – jadi kenapa harus orang percaya dengan apa yang dikatakannya?" kata Tengku Sariffuddin.

Beliau juga berkata adalah jelas bahawa Muhyiddin ibarat talam dua muka iaitu berbuat sesuatu mengikut kesesuaian politiknya tetapi secara peribadi lain pula halnya.

"Ini jelas apabila beliau menyerang perdana menteri atas dakwaan rasuah, sedangkan semua orang dalam tahu sejarah sebenarnya sebagai menteri besar Johor," kata Tengku Sariffuddin.

Tag: [akaun bank](#), [siasatan](#), [Datuk Seri Tengku Sariffuddin Tengku Ahmad](#), [setiausaha akhbar](#), [Datuk Seri Najib Tun Razak](#), [Tun Dr Mahathir Mohamad](#), [Tan Sri Muhyiddin Yassin](#)

© 2016 Astro Awani Network Sdn. Bhd. (535275-D) All Rights Reserved.

Source: <http://www.astroawani.com/berita-malaysia/siasatan-komprehensif-tiada-pelanggaran-undang-undang-pegawai-pm-115511>